



**Tussenresultate Persverklaring vir Remgro Beperk
(Remgro)**

GROOT BELEGGINGS LEWER BESTENDIGE RESULTATE

- **Wesensverdienste per aandeel neem met 25.9% tot 868 sent toe**
- **Wesensverdienste per aandeel, uitgesluit eenmalige koste en opsie hermeting, neem met 4.3% tot 744 sent toe**
- **Tussendividend per aandeel vir die tydperk neem met 4.9% tot 194 sent toe**
- **Intrinsieke netto batewaarde per aandeel soos op 31 Desember 2016 was R257.79**

Die meerderheid van Remgro se onderliggende beleggings, in besonder sy bankwese- en gesondheidsorgbeleggings het 'n bestendige prestasies vir die ses maande geëindig 31 Desember 2016 gelewer. Die nywerheidsbeleggings se bydrae tot wesensverdienste het ook 'n merkwaardige verbetering getoon in vergeleke met die Desember 2015 resultate. Die voedsel, drank en huishoudelike sorg- asook die infrastruktuurbeleggingsresultate is 'n weerspieëling van die uitdagende ekonomiese- en handelstoestande wat die Suid-Afrikaanse verbruiker- en vervaardigingssektore beïnvloed.

Gedurende Oktober 2016 het Remgro 'n regte-uitgifte voltooi ingevolge waarvan 48 110 637 nuwe Remgro gewone aandele en 3 550 635 B-gewone aandele uitgereik is teen 'n inskrywingsprys van R192.50 per aandeel vir 'n totale bedrag van R9 944.8 miljoen.

Vir die tydperk onder oorsig het wesensverdienste met 29.7%, vanaf R3 616 miljoen tot R4 690 miljoen, toegeneem, terwyl wesensverdienste per aandeel (WVPA) met 25.9%, vanaf 689.4 sent tot 867.7 sent, toegeneem het. Die verskil in die toename tussen wesensverdienste en WVPA is toeskryfbaar aan die impak van die regte-uitgifte in die tydperk onder oorsig.

Ingesluit in wesensverdienste vir die vergelykende tydperk is eenmalige transaksiekoste ten bedrae van R128 miljoen ("eenmalige koste") wat aangegaan is met Mediclinic se regte-uitgifte en die Al Noor Hospitals Group plc (Al Noor)-transaksie. Die tydperk onder oorsig het 'n positiewe billike waarde aanpassing van R667 miljoen ingesluit, wat verband hou met die afname in waarde van skuldbriefhouers se omruilopsie (verantwoord as 'n afgeleide verpligting) van die skuldbriewe ("opsie hermeting") wat in Maart 2016 uitgereik is om die buitelandse oorbruggingsfinansiering gedeeltelik te herfinansier wat met die Al Noor-transaksie bekom is. Die skuldbriewe is omruilbaar vir Mediclinic plc-aandele en/of kontant en billike waarde aanpassings op die opsie (wat *inter alia* bewegings in die onderliggende aandeelprys van Mediclinic plc weerspieël) gaan na verwagting onbestendigheid in wesensverdienste gedurende die vyfjaar-termyn daarvan veroorsaak. Met uitsluiting van hierdie items het wesensverdienste met 7.5%, vanaf R3 744 miljoen tot R4 023 miljoen, toegeneem, terwyl WVPA met 4.3%, vanaf 713.8 sent tot 744.3 sent, toegeneem het.

Die bydrae van **voedsel, drank en huishoudelike sorg** tot Remgro se wesensverdienste het R945 miljoen (2015: R1 242 miljoen) bedra, wat 'n afname van 23.9% verteenwoordig. RCL Foods se bydrae tot Remgro se wesensverdienste het met 44.6% tot R318 miljoen (2015: R574 miljoen) afgeneem. In die vergelykende tydperk is RCL Foods se resultate positief beïnvloed deur die vrystelling van R163 miljoen wat vir onsekere belastingdispute as deel

van die Foodcorp-verkryging voorsien is. Met uitsluiting van die bostaande, sou RCL Foods se bydrae tot Remgro se wesensverdienste met 29.0% afgeneem het vanaf R448 miljoen. Hierdie afname is hoofsaaklik te wyte aan die laer bydrae deur die hoenderbesigheid wat gedeeltelik teengewerk is deur die sterk vertoning van die suikerbesigheid. Die hoenderbesigheid is geaffekteer deur 'n massiewe ooraanbod in die plaaslike mark vanweë plaaslike produksie en die storting van ingevoerde hoender, terwyl die suikerbesigheid gebaat het by prysverhogings wat gehelp het om laer volumes teen te werk. Unilever se bydrae tot Remgro se wesensverdienste het met 14.3% tot R263 miljoen (2015: R307 miljoen) afgeneem. Hierdie afname was hoofsaaklik te wyte aan laer belastingtoelaes gevolg deur die voltooiing van vervaardigingsbeleggings sowel as 'n verswakkende handelsomgewing. Distell se bydrae tot wesensverdienste, wat die belegging in Capevin Holdings insluit, het R364 miljoen (2015: R361 miljoen) bedra. Distell se resultate is negatief beïnvloed deur 'n sterker rand, veral teenoor die Britse pond, sowel as hewige kompetisie en druk op verbruikers.

Die wesensverdiensbydrae van die **bankafdeling** het R1 580 miljoen (2015: R1 386 miljoen) bedra, wat 'n toename van 14.0% is. Beide FirstRand en RMBH het wesensverdiensstegroei van 14.0% gerapporteer. Op 'n genormaliseerde basis, wat sekere nie-bedryfs en rekeningkundige afwykings uitsluit, hoofsaaklik aanpassings ten opsigte van die aandeelgebaseerde betalingverpligting, het FirstRand en RMBH onderskeidelik verdienstegroei van 6.7% en 6.4% gerapporteer. Hierdie toenames was hoofsaaklik as gevolg van groei in beide netto rente- en nie-rente-inkomste vanaf FNB, RMB en WesBank, gedeeltelik teengewerk deur 'n toename in kredietwaardedalingskoste.

Mediclinic, Remgro se enigste **gesondheidsorg**belegging, se bydrae tot wesensverdienste het R983 miljoen (2015: R787 miljoen) bedra. Hierdie toename is hoofsaaklik die gevolg van Remgro se verhoogde belang in Mediclinic (42.1% tot 44.6%), die insluiting van die resultate van Al Noor en Spire Healthcare Group plc (Spire) en 'n sterk vertoning in Switserland, asook goeie organiese groei in Suider-Afrika. Die toename is gedeeltelik teengewerk deur die onderprestasie van die Midde-Oosterse besigheid, wat geraak is deur 'n aantal bedryfs- en regulatoriese faktore, waaronder die nuwe vereistes ten opsigte van versekeringsbybetalings, doktervakatures en 'n vertraging in die opening van fasiliteite.

RMI Holdings, Remgro se **versekering**belegging, se bydrae tot wesensverdienste het met 8.1% tot R492 miljoen toegeneem. Op 'n genormaliseerde basis het RMI Holdings 'n toename van 11.2% in verdienste gerapporteer, met OUTsurance en Discovery wat verdienstegroei van onderskeidelik 24.1% en 2.4% behaal het. Dit is gedeeltelik teengewerk deur laer verdienste van MMI Holdings (laer met 3.8%). 'n Wesentlike verbetering in die koste-tot-inkomste verhouding het gesorg vir goeie resultate deur OUTsurance, veral by Youi, hoofsaaklik as gevolg van skaalvoordele en koste doeltreffendheid.

Nywerheid sluit in Total se bydrae tot Remgro se wesensverdienste wat R102 miljoen (2015: R51 miljoen) bedra. Ingesluit in die bydrae tot wesensverdienste vir die tydperk onder oorsig is ongunstige voorraadherwaardasies ten bedrae van R28 miljoen (2015: ongunstige voorraadherwaardasies van R144 miljoen). Hierdie herwaardasies is die gevolg van die onbestendigheid in die Brent ru-olieprys en die randwisselkoers. Uitgesluit dié herwaardasie, het die bydrae met 33.3%, van R195 miljoen tot R130 miljoen, afgeneem, hoofsaaklik vanweë 'n laer raffineringmarge en laer volumes. Remgro se deel van KTH se resultate het 'n wins van R58 miljoen bedra (2015: 'n verlies van R260 miljoen). In die vergelykende tydperk is KTH se resultate negatief beïnvloed deur ongunstige billike waarde aanpassings wat verband hou met sy beleggings in Exxaro Resources Beperk en MMI Holdings Beperk se voorkeuraandele. Air Products en Wispeco se bydrae tot wesensverdienste het onderskeidelik R151 miljoen en R90 miljoen bedra (2015: R142 miljoen en R54 miljoen), terwyl PGSI R25 miljoen tot Remgro se wesensverdienste bygedra het (2015: R18 miljoen).

Grindrod, Remgro se **infrastruktuur**belegging, se bydrae tot Remgro se wesensverdienste het 'n verlies van R18 miljoen (2015: 'n wins van R43 miljoen) bedra. Die verlies is hoofsaaklik te wyte aan die voortdurende swak kommoditeitsmarkte en lae droëvrag-verskepingstariewe gedurende die tydperk. Vir die tydperk onder oorsig het die

CIV-groep R44 miljoen tot wesensverdienste bygedra (2015: R35 miljoen). Remgro se deel van SEACOM se verlies het R18 miljoen (2015: 'n verlies van R28 miljoen) bedra.

Media en sport bestaan hoofsaaklik uit die belange in eMedia en verskeie sportbelange, waaronder die belange in rugby-franchises, sowel as die Stellenbosch Academy of Sport. eMedia se bydrae tot Remgro se wesensverdienste het R33 miljoen (2015: R11 miljoen) bedra, hoofsaaklik vanweë hoër advertensie-inkomste weens 'n verbetering in markaandeel. Die toename is gedeeltelik teengewerk deur hoër besigheidsontwikkelingskoste, asook voortgesette belegging in die multikanaalbesigheid. Ander media- en sportbelange se bydrae tot wesensverdienste het 'n verlies van R58 miljoen (2015: 'n verlies van R39 miljoen) bedra.

Die bydrae van **ander beleggings** tot wesensverdienste het R39 miljoen (2015: R31 miljoen) bedra, waarvan Business Partners se bydrae R23 miljoen (2015: R21 miljoen) was.

Sentrale tesourie en ander netto korporatiewe koste sluit finansieringsinkomste in wat R105 miljoen (2015: R77 miljoen) bedra het. Hierdie toename is hoofsaaklik die gevolg van hoër gemiddelde kontantbalanse as gevolg van Remgro se regte-uitgifte. Finansieringskoste bestaan hoofsaaklik uit rente ten bedrae van R458 miljoen (2015: R91 miljoen) en eenmalige transaksiekoste in die vergelykende tydperk ten bedrae van R128 miljoen, wat verband hou met Mediclinic se regte-uitgifte en die Al Noor-transaksie, asook 'n positiewe billike waarde aanpassing van R667 miljoen in die tydperk onder oorsig, ten opsigte van die afname in waarde van die omruilopsie van die omruilbare skuldbriewe. Ander netto korporatiewe koste het R75 miljoen (2015: R194 miljoen) bedra. Die vergelykende tydperk sluit transaksie- en finansieringskoste ten bedrae van R115 miljoen in ten opsigte van Remgro se verkryging van Spire. Hierdie koste is van Mediclinic verhaal, buite wesensverdienste, as deel van die Spire-verkoopsom.

Kontant by die kern het met R8 515 miljoen tot R12 293 miljoen op 31 Desember 2016 toegeneem grootliks as gevolg van die regte-uitgifte wat R9 813 miljoen gein het en dividende van R2 572 miljoen wat ontvang is.

Vir die ses maande geëindig 31 Desember 2016, is 'n tussendividend van 194 sent per aandeel verklaar uit inkomstereserwes ten opsigte van beide die gewone aandele sonder pariwaarde en die ongenoteerde B-gewone aandele sonder pariwaarde. Hierdie verteenwoordig 'n 4.9% toename vanaf die tussendividend verklaar vir die ses maande geëindig 31 Desember 2015 van 185 sent per aandeel.

Jannie Durand, hoofuitvoerende beamppte van Remgro, sluit af: "Die ekonomiese klimaat en politieke omgewing bly moeilik en onbestendig. Remgro gaan voort om sy bestaande beleggings te ondersteun en belê in besighede met 'n bestendige rekord om te verseker dat aanvaarbare langtermyn opbrengstes op kapitaal geïnvesteer verkry word."

Kontak: Remgro Beperk
Jannie Durand ((021) 888-3253)

Uitgereik en versprei deur: Keyter Rech Investor Solutions
Marlize Keyter (083 701 2021)

Uitreikingsdatum: 16 Maart 2017

JSE kode: REM

Webwerf: www.remgro.com
